

MEMORANDWM CYDSYNIAD DEDDFWRIAETHOL

Bil yr Amgylchedd

1. Gosodir y Memorandwm Cydsyniad Deddfwriaethol hwn o dan Reol Sefydlog ("RhS") 29.2. Mae Rheol Sefydlog 29 yn rhagnodi bod yn rhaid gosod Memorandwm Cydsyniad Deddfwriaethol, ac y ceir cyflwyno Cynnig Cydsyniad Deddfwriaethol, gerbron y Cynulliad Cenedlaethol os yw Bil gan Senedd y DU yn gwneud darpariaeth mewn perthynas â Chymru at ddiben sydd o fewn cymhwysedd deddfwriaethol y Cynulliad Cenedlaethol, neu at ddiben sy'n addasu'r cymhwysedd hwnnw.

2. Cafodd Bil yr Amgylchedd (y "Bil") ei gyflwyno yn Nhŷ'r Cyffredin ar 30 Ionawr 2014. Mae'r Bil i'w weld yma:

<https://services.parliament.uk/Bills/2019-20/environment/documents.html>

Amcanion Polisi

3. Mae Llywodraeth y DU wedi datgan mai ei hamcanion polisi ar gyfer y Bil hwn yw darparu fframwaith cyfreithiol ar gyfer llywodraethu amgylcheddol unwaith y bydd y DU yn gadael yr UE, a darparu hefyd ar gyfer gwella'r amgylchedd mewn ffyrdd penodol, gan gynnwys mesurau ar wastraff ac effeithlonrwydd o ran adnoddau, ansawdd aer ac adalw amgylcheddol, dŵr, natur a bioamrywiaeth, a chyfamodau cadwraeth.

Crynodeb o'r Bil

4. Noddir y Bil gan Adran yr Amgylchedd, Bwyd a Materion Gwledig.

5. Mae'r Bil yn gwneud darpariaethau ynghylch targedau, cynlluniau a pholisïau i wella'r amgylchedd naturiol; ar gyfer datganiadau ac adroddiadau am ddiogelu'r amgylchedd; ar gyfer Swyddfa'r Diogelu'r Amgylchedd; ynghylch gwastraff ac effeithlonrwydd o ran adnoddau; ansawdd aer; ar gyfer adalw cynhyrchion sy'n methu â bodloni safonau amgylcheddol; ynghylch dŵr; natur a bioamrywiaeth; ar gyfer cyfamodau cadwraeth; rheoleiddio cemegau; a dibenion cysylltiedig.

6. Dyma'r cymalau sy'n benodol berthnasol i faterion sydd o fewn cymhwysedd deddfwriaethol y Cynulliad:

- Rhan 1 – Llywodraethu Amgylcheddol – cymal 19 (Datganiadau am Filiau sy'n cynnwys cyfraith amgylcheddol newydd) a chymal 43 (Ystyr cyfraith amgylcheddol) i'r graddau y mae'n gysylltiedig â chymal 19
- Rhan 3 – Gwastraff ac Effeithlonrwydd o ran Adnoddau – cymalau 47 a 48 (Cyfrifoldeb Cynhyrchwyr) ac Atodlenni 4 a 5, cymalau 49 - 52 (Effeithlonrwydd o ran Adnoddau), cymal 55 (Olrhain gwastraff yn

electronig: Prydain Fawr), cymal 57 (Gwastraff peryglus: Cymru a Lloegr), cymal 60 (Rheoliadau o dan Ddeddf Diogelu'r Amgylchedd 1990), cymal 61 (Pwerau i wneud cynlluniau codi tâl), cymal 63 (Pwerau gorfodi), cymal 65 (Gorfodi mewn perthynas â gollwng sbwriel), cymal 66 (Hysbysiadau Cosb Benodedig), cymal 67 (Rheoleiddio gweithgareddau sy'n achosi llygredd)

- Rhan 4 – Ansawdd aer ac adalw amgylcheddol – cymal 69 (Fframwaith rheoli ansawdd aer yn lleol, cymal 70 (Ardaloedd rheoli mwg: diwygiadau i Ddeddf Aer Glân 1993)
- Rhan 5 – Dŵr – cymalau 75 a 76 (cynlluniau a chynigion), cymal 77 (Pŵer awdurdod i wneud gwybodaeth yn ofynnol), cymal 79 (Cyflwyno dogfennau'n electronig), cymal 81 (Ansawdd dŵr: pwerau'r Ysgrifennydd Gwladol), cymal 82 (Ansawdd dŵr: pwerau Gweinidogion Cymru), cymal 85 (Ansawdd dŵr: dehongli), cymalau 87 – 89 (Draenio tir)
- Rhan 8 – Darpariaethau Amrywiol a Chyffredinol – cymal 125 (Diwygio'r ddeddfwriaeth ar Gofrestru, Gwerthuso, Awdurdodi a Chyfyngu ar Gemegau (REACH))

Y darpariaethau yn y Bil y mae angen cydsyniad ar eu cyfer

Byddai angen cydsyniad y Cynulliad ar gyfer y darpariaethau a ganlyn:

Rhan 1 – Llywodraethu Amgylcheddol

Cymal 19 (Datganiadau am Filiau sy'n cynnwys cyfraith amgylcheddol newydd)

7. Mae'r cymal hwn yn ei gwneud yn ofynnol i Weinidogion y Goron, wrth gyflwyno Biliau gerbron Senedd y DU, wneud datganiadau 'dim atchwelyd', h.y. na fydd lefel yr amddiffyniad amgylcheddol yn is na'r safonau cyffredin sy'n gymwys yn yr UE a'r DU). Mae'r broses yn gymwys pryd bynnag y bydd un o Weinidogion y Goron yn cyflwyno Bil gerbron Senedd y DU a fyddai, pe bai'n dod yn ddeddf, yn cael ei ystyried yn 'gyfraith amgylcheddol' at ddibenion cymal 43.

8. Mae datganiad o dan gymal 19 yn ddatganiad bod y Bil yn cynnwys darpariaeth sy'n gyfraith amgylcheddol, ac yn ddatganiad naill ai –
- i'r perwyl bod y Gweinidog o'r farn na fydd y Bil yn cael yr effaith o leihau lefel yr amddiffyniad amgylcheddol a ddarperir mewn unrhyw gyfraith amgylcheddol sy'n bodoli eisoes; neu
 - nad yw'r Gweinidog yn gallu gwneud y datganiad uchod, ond bod y Llywodraeth, er hynny, am i Senedd y DU fwrw ymlaen â'r Bil.

9. Yn wahanol i weddill y Bil, mae 'cyfraith amgylcheddol' at y dibenion hyn yn cynnwys darpariaeth ddeddfwriaethol ddatganoledig. Effaith hynny yw bod y gofynion uchod yn gymwys i'r un graddau i Filiau'r DU sy'n

ymwneud â 'chyfraith amgylcheddol' sy'n gymwys yng Nghymru, yn yr un ffordd ag y mae'r gofynion hynny'n gymwys yn Lloegr.

10. Mae Llywodraeth y DU o'r farn bod y ddarpariaeth hon yn ymwneud â phrosesau Seneddol. Gan fod 'Senedd y DU', at ei gilydd, yn bwnc a gadwyd yn ôl, safbwynt Llywodraeth y DU yw nad oes angen cydsyniad y Cynulliad. Er mai proses yw hon yr ymglymerir â hi drwy weithdrefn atebolrwydd yn Senedd y DU, mae Llywodraeth Cymru o'r farn bod diben y ddarpariaeth, mewn gwirionedd, yn un amgylcheddol – pwnc sydd wedi'i ddatganoli.

11. Am y rhesymau uchod, mae Llywodraeth Cymru o'r farn bod angen cydsyniad ar gyfer cymal 19.

Cymal 43 (Ystyr cyfraith amgylcheddol)

12. Cymal 43 (Ystyr cyfraith amgylcheddol) i'r graddau y mae'n gysylltiedig â chymal 19.

Rhan 3 – Gwastraff ac Effeithlonrwydd o ran Adnoddau

cymalau 47 a 48 (Cyfrifoldeb y cynhyrchydd) ac Atodlenni 4 a 5

13. Mae cymal 47 ac Atodlen 4 yn caniatáu i'r awdurdod cenedlaethol perthnasol wneud rheoliadau ynglŷn â rhwymedigaethau sy'n gysylltiedig â chyfrifoldeb y cynhyrchydd ac ynglŷn â gorfodi'r rheoliadau hynny. Gwneir hynny drwy ddiwygiadau i Ddeddf yr Amgylchedd 1995.

14. Mae cymal 48 ac Atodlen 5 yn caniatáu i'r awdurdod cenedlaethol perthnasol wneud rheoliadau sy'n ei gwneud yn ofynnol i'r rheini sy'n gweithgynhyrchu, yn prosesu, yn dosbarthu neu'n cyflenwi cynhyrchion neu ddeunyddiau, dalu costau gwaredu'r cynhyrchion hynny, neu gyfrannu at y costau hynny.

15. Yr awdurdod cenedlaethol perthnasol yng Nghymru yn achos y ddwy ddarpariaeth hyn yw Gweinidogion Cymru, er bod yr Ysgrifennydd Gwladol yn cael deddfu mewn perthynas â Chymru gyda chaniatâd Gweinidogion Cymru (pŵer 'cydredol plws').

16. Mae'r pwerau a roddir yng nghymal 47/Atodlen 4 ac yng nghymal 48/Atodlen 6 i gyd yn ymarferadwy drwy weithdrefn gadarnhaol gerbron y Cynulliad, neu gerbron Senedd y DU pan gânt eu harfer gan yr Ysgrifennydd Gwladol.

17. I'r graddau y mae'r darpariaethau hyn at ddiben sydd o fewn cymhwysedd deddfwriaethol y Cynulliad (h.y. gwastraff), barn Llywodraeth Cymru yw bod angen ei gydsyniad ar eu cyfer.

Cymalau 49 – 52 (Effeithlonrwydd o ran adnoddau)

18. Mae cymal 49 (gwybodaeth am effeithlonrwydd o ran adnoddau) ac Atodlen 6 yn rhoi'r pŵer i'r awdurdod cenedlaethol perthnasol wneud rheoliadau sy'n nodi'r gofynion i weithgynhyrchwyr a chynhyrchwyr ddarparu gwybodaeth ynglŷn ag effeithlonrwydd eu cynhyrchion o ran adnoddau. Mae'r holl reoliadau o dan Atodlen 6 yn dilyn y weithdrefn gadarnhaol.
19. Mae cymal 50 (gofynion o ran effeithlonrwydd adnoddau) ac Atodlen 7 yn rhoi'r pŵer i'r awdurdod cenedlaethol perthnasol wneud rheoliadau sy'n nodi'r gofynion o ran effeithlonrwydd adnoddau y mae'n ofynnol i gynhyrchion eu bodloni. Mae'r holl reoliadau o dan Atodlen 7 yn dilyn y weithdrefn gadarnhaol.
20. Mae cymal 51 ac Atodlen 8 yn galluogi'r awdurdod cenedlaethol perthnasol i wneud rheoliadau sy'n sefydlu cynlluniau blaendal. Fel arfer, mae rheoliadau o dan Atodlen 8 yn dilyn y weithdrefn negyddol, ac eithrio o dan yr amgylchiadau a bennir yn h nghymal 51(5). Y weithdrefn gadarnhaol a ddefnyddir o dan yr amgylchiadau hynny.
21. Diffinnir yng nghymalau 49 - 51 mai'r awdurdod cenedlaethol perthnasol yng Nghymru yw Gweinidogion Cymru neu'r Ysgrifennydd Gwladol. Caiff pŵer Gweinidogion Cymru i ddeddfu ei gyfyngu i ddarpariaeth a fyddai, o'i cynnwys yn un o Ddeddfau'r Cynulliad, o fewn cymhwysedd deddfwriaethol. Mae gan yr Ysgrifennydd Gwladol y pŵer i ddeddfu dros Gymru mewn achosion y tu allan i'r cymhwysedd hwn, neu i ddeddfu'n gyffredinol os yw Gweinidogion Cymru yn rhoi eu cydsyniad (cydredol plws).
22. Mae cymal 52 ac Atodlen 9 yn galluogi'r awdurdod cenedlaethol perthnasol i wneud rheoliadau ynglŷn â thaliadau am eitemau plastig untro. Yr awdurdod cenedlaethol perthnasol ar gyfer Cymru yw Gweinidogion Cymru. (Mae rheoliadau o dan Atodlen 9 yn dilyn y weithdrefn negyddol, ac eithrio yn y sefyllfaoedd a bennir yng nghymal 52(3). Y weithdrefn gadarnhaol a ddefnyddir o dan yr amgylchiadau hynny.
23. Mae cymalau 49-52 yn gwneud darpariaeth at ddiben sydd o fewn cymhwysedd deddfwriaethol y Cynulliad (h.y. gwastraff).

Cymal 55 (Olrhain gwastraff yn electronig: Prydain Fawr)

24. Mae cymal 55 yn diwygio Deddf Diogelu'r Amgylchedd 1990, gan fewnosod adrannau 34CA a 34CB newydd, er mwyn creu pwerau i gyflwyno trefniadau i olrhain gwastraff yn electronig (digidol) yn Lloegr, Cymru a'r Alban, ac i sefydlu system electronig system at y diben hwnnw drwy gyfrwng rheoliadau.

25. Mae'r pwerau a roddir drwy fewnosod adrannau 34CA a 34CB yn gymwys i Weinidogion Cymru.

26. Mae cymal 55(3) yn diwygio adran 160A(2) o Ddeddf Diogelu'r Amgylchedd 1990, fel y'i mewnosodir gan gymal 60, er mwyn darparu ar gyfer y weithdrefn ar gyfer y pwerau newydd i wneud rheoliadau. Mae rheoliadau o dan yr adrannau 34CA a 34CB newydd yn dilyn y weithdrefn negyddol, ac eithrio yn y sefyllfaoedd a bennir yn yr adran 160A(2) newydd. Y weithdrefn gadarnhaol a ddefnyddir o dan yr amgylchiadau hynny.

27. I'r graddau y maent yn gwneud darpariaeth at ddiben sydd o fewn cymhwysedd deddfwriaethol y Cynulliad (h.y. gwastraff), barn Llywodraeth Cymru yw bod angen ei gydsyniad.

Cymal 57 (Gwastraff peryglus: Cymru a Lloegr)

28. Mae'r cymal hwn yn diwygio Deddf Diogelu'r Amgylchedd 1990 mewn perthynas â gwastraff peryglus yng Nghymru a Lloegr. Mae pwerau hefyd yn yr adran 62ZA newydd i wneud rheoliadau ynghylch rheoleiddio gwastraff peryglus, neu mewn cysylltiad â hynny. Caiff y pwerau eu rhoi i'r 'awdurdod cenedlaethol perthnasol', sef Gweinidogion Cymru yng Nghymru.

29. Mae rheoliadau o dan yr adran 62ZA newydd yn dilyn y weithdrefn negyddol, ac eithrio yn y sefyllfaoedd a bennir yn yr adran 160A(2) newydd (fel y'i cyflwynir gan gymal 60 ac fel y'i diwygir gan gymal 57). Y weithdrefn gadarnhaol a ddefnyddir yn yr achosion hynny.

30. I'r graddau y mae'n gwneud darpariaeth at ddiben sydd o fewn cymhwysedd deddfwriaethol y Cynulliad (h.y. gwastraff), barn Llywodraeth Cymru yw bod angen cydsyniad.

Cymal 60 (Rheoliadau o dan Ddeddf Diogelu'r Amgylchedd 1990)

31. Mae'r ddarpariaeth hon yn diwygio Deddf Diogelu'r Amgylchedd 1990 mewn perthynas â gweithdrefnau ar gyfer is-ddeddfwriaeth yn y Ddeddf. Mae hyn yn cydgrynhoi'r amryfal ddarpariaethau newydd a fewnosodir i'r Ddeddf gan y Bil hwn.

32. I'r graddau y mae darpariaeth yn cael ei gwneud at ddiben sydd o fewn cymhwysedd deddfwriaethol y Cynulliad (h.y. mae'n ganlyniadol i'r darpariaethau y mae'n gysylltiedig â hwy sydd, ynddynt eu hunain, yn rhai sy'n ymdrin â diogelu'r amgylchedd/gwastraff ac sydd, felly, wedi'u datganoli), mae Llywodraeth Cymru o'r farn bod angen cydsyniad.

Cymal 61 (Pwerau i wneud cynlluniau codi tâl)

33. Mae cymal 61 yn diwygio adran 41 o Ddeddf yr Amgylchedd 1995 drwy fewnosod pwerau a fydd yn caniatáu i Asiantaeth yr Amgylchedd, Cyfoeth Naturiol Cymru ac Asiantaeth Diogelu Amgylchedd yr Alban wneud cynlluniau codi tâl er mwyn adennill costau y byddant yn eu hysgwyddo drwy ymgymryd â swyddogaethau. I'r graddau y mae'n gwneud darpariaeth at ddiben sydd o fewn cymhwysedd deddfwriaethol y Cynulliad (gwastraff a diogelu'r amgylchedd), barn Llywodraeth Cymru yw bod angen ei gydsyniad.

Cymal 63 (Pwerau gorfodi)

34. Mae cymal 63 yn cyflwyno Atodlen 10 sy'n diwygio deddfwriaeth sy'n ymwneud â phwerau gorfodi mewn perthynas â gwastraff a materion amgylcheddol eraill. Yn benodol, mae'r diwygiadau'n cynnwys mân ddiwygiadau i Ddeddf Rheoli Llygredd (Diwygio) 1989; diwygiadau i Ddeddf Diogelu'r Amgylchedd 1990 mewn perthynas â phwerau i chwilio ac i ymafael mewn cerbydau mewn cysylltiad â throeddau sy'n gysylltiedig â gwastraff, a diwygiadau i Ddeddf Diogelu'r Amgylchedd 1990 er mwyn darparu pwerau gwneud cyfarwyddydau mewn perthynas â gwastraff. I'r graddau y mae'r cymal hwn yn gwneud darpariaeth at ddibenion sydd o fewn cymhwysedd deddfwriaethol y Cynulliad (gwastraff, ansawdd aer a diogelu'r amgylchedd), barn Llywodraeth Cymru yw bod angen ei gydsyniad.

Cymal 65 (Gorfodi mewn perthynas â gollwng sbwriel)

35. Mae cymal 65 yn diwygio Rhan 4 o Ddeddf Diogelu'r Amgylchedd 1990 mewn perthynas â chamau gorfodi yn erbyn gollwng sbwriel a dosbarthu deunyddiau argraffedig rhad ac am ddim heb yr awdurdod i wneud hynny.

36. Mae cymal 65 yn rhoi pŵer newydd i Weinidogion Cymru (gan mai hwy yw'r 'person priodol' yng Nghymru) ragnodi amodau drwy gyfrwng rheoliadau, a'r amodau hynny'n rhai y mae'n rhaid iddynt gael eu bodloni gan swyddog awdurdodedig sy'n gweithredu ar ran awdurdod sy'n ymdrin â gollwng sbwriel. Mae'r cymal hwn hefyd yn gwneud darpariaeth sy'n ei gwneud yn ofynnol i awdurdod sy'n ymdrin â gollwng sbwriel ddirymu awdurdodiad swyddog os yw'r swyddog yn methu â bodloni'r amodau a ragnodir. Mae'r pwerau newydd yn dilyn y weithdrefn negyddol.

37. Mae cymal 65 hefyd yn rhoi pwerau i Weinidogion Cymru wneud canllawiau. Ni fyddai unrhyw weithdrefn ar gyfer unrhyw ganllawiau a ddyroddid o dan y pwerau hyn.

38. Gan fod y cymal hwn yn gwneud darpariaeth ar gyfer gwastraff/diogelu'r amgylchedd, sef diben sydd o fewn cymhwysedd deddfwriaethol y Cynulliad, mae Llywodraeth Cymru o'r farn bod angen ei gydsyniad.

Cymal 66 (Hysbysiadau cosb benodedig)

39. Mae cymal 66 yn diwygio adrannau 33ZA, 33ZB, 34ZA a 34ZB o Ddeddf Diogelu'r Amgylchedd 1990 fel y bo modd amrywio lefel yr hysbysiadau cosb benodedig o dan yr adrannau hynny, a hefyd amrywio'r cyfnod amser lle caniateir i swm llai gael ei roi er mwyn talu'r gosb benodedig. Mae adrannau 33ZB a 34ZB yn gymwys i Gymru, tra bo 33ZA a 33ZB yn gymwys i Loegr.
40. Mae'r diwygiadau yng nghymal 66 yn caniatáu i Weinidogion Cymru fedru gwneud rheoliadau sy'n pennu symiau cosb yn lle'r rheini a bennir ar hyn o bryd yn yr adrannau uchod. Mae'r pwerau hyn yn dilyn y weithdrefn negyddol yn unol ag adran 160A of Ddeddf 1990 (fel y'i mewnosodir gan gymal 60).
41. Gan fod y cymal hwn yn gwneud darpariaeth ar gyfer gwastraff/diogelu'r amgylchedd, sef diben sydd o fewn cymhwysedd deddfwriaethol y Cynulliad, mae Llywodraeth Cymru o'r farn bod angen ei gydsyniad.

Cymal 67 (Rheoleiddio gweithgareddau sy'n acrhosi llygredd)

42. Mae'r cymal hwn yn diwygio Atodlen 1 i Ddeddf Atal a Rheoli Llygredd 1999, sy'n nodi at ba ddibenion y caiff yr Ysgrifennydd Gwladol wneud rheoliadau o dan Adran 2 o'r Ddeddf. Mae is-adran (2) yn mewnosod is-baragraff newydd i baragraff 4 o Atodlen 1, gan nodi diben newydd y ceir gwneud rheoliadau ar ei gyfer. Mae hyn yn caniatáu i'r Ysgrifennydd Gwladol wahardd gweithgaredd oni bai ei fod yn bodloni amodau y penderfynir arnynt gan Asiantaeth yr Amgylchedd a/neu Cyfoeth Naturiol Cymru yn unol â'r rheoliadau.
43. Mae'r swyddogaethau o dan Ddeddf Atal a Rheoli Llygredd 1999 yn ymarferadwy gan Weinidogion Cymru mewn perthynas â Chymru, felly mae'r diwygiad newydd hwn hefyd yn ehangu cwmpas pwerau Gweinidogion Cymru.
44. Gan fod y cymal hwn yn gwneud darpariaeth ar gyfer gwastraff/diogelu'r amgylchedd, sef diben sydd o fewn cymhwysedd deddfwriaethol y Cynulliad, mae Llywodraeth Cymru o'r farn bod angen ei gydsyniad.

Rhan 4 – Ansawdd Aer ac Adalw Amgylcheddol

Cymal 69 (Fframwaith Rheoli Ansawdd Aer Lleol)

45. Mae cymal 69 yn cyflwyno Atodlen 11 sy'n gwneud diwygiadau i Ddeddf yr Amgylchedd 1995 mewn perthynas ag ansawdd aer.
46. Mae Atodlen 11, paragraff 2 yn diwygio adran 80 (strategaeth genedlaethol ar ansawdd aer) o Ddeddf yr Amgylchedd 1995 ("Deddf 1995"). Mae'r paragraff hwn yn hepgor adran 80(3) o Ddeddf 1995 yn ogystal â gwneud darpariaeth ar gyfer adolygu'r strategaeth genedlaethol ar ansawdd aer.

Gan fod adran 80(3) wedi'i hepgor, nid oes unrhyw amheuaeth mai Gweinidogion Cymru sy'n gyfrifol am strategaeth genedlaethol ar ansawdd aer mewn perthynas â Chymru, ac mae hefyd yn adlewyrchiad mwy cywir o'r sefyllfa bresennol a natur ddatganoledig y rôl hon.

47. Mae paragraff 2(3) o Atodlen 11 yn gwneud darpariaeth arall mewn perthynas ag adolygu'r strategaeth genedlaethol ar ansawdd aer. Swyddogaeth Gweinidogion Cymru yw cyhoeddi'r strategaeth ar gyfer Cymru, felly, pe bai'r Cynulliad am ddeddfu i ddarparu darpariaeth o'r fath yng Nghymru, byddai hynny o fewn ei gymhwysedd ef a byddai angen ei gydsyniad.

48. I'r graddau y mae'n ymwneud â pharagraffau 2(3) o Atodlen 11, mae cymal 69 yn gwneud darpariaeth at ddiben sydd o fewn cymhwysedd deddfwriaethol y Cynulliad ac mae Llywodraeth Cymru o'r farn bod angen ei gydsyniad.

Cymal 70 (Ardaloedd rheoli mwg: diwygiadau i Ddeddf Aer Glân 1993)

49. Mae'r cymal hwn yn cyflwyno Atodlen 12 sy'n gwneud amryfal ddiwygiadau i Ddeddf Aer Glân 1993.

50. Mae Rhan 2 o Atodlen 12 yn diwygio adrannau 20 a 21 o Ddeddf Aer Glân 1993 mewn perthynas â Chymru er mwyn caniatáu i Weinidogion Cymru gyhoeddi rhestr o danwyddau awdurdodedig a lleoedd tân esempt i'w defnyddio mewn ardaloedd rheoli mwg, yn hytrach na bod yn rhaid mynd ati bob blwyddyn i baratoi Rheoliadau a Gorchmynion at yr un diben. Bwriad y newidiadau yw gwneud y broses o ddynodi tanwyddau awdurdodedig a lleoedd tân esempt y caniateir eu gwerthu mewn ardaloedd rheoli mwg, yn un fwy effeithlon a llai trwm ar adnoddau. Mae'r system rhestrau yn ei lle eisoes yn Lloegr a'r Alban ac felly, mae'r darpariaethau hyn yn golygu y bydd gan Gymru yr un system â gweddill y DU.

51. Mae'r rhan hon yn gwneud darpariaethau mewn perthynas ag ansawdd aer ac mae'n ymwneud â Chymru yn unig. Felly, mae angen cydsyniad ar eu cyfer.

52. Mae paragraffau 14 a 15 yn diwygio adrannau 20 a 21 o Ddeddf 1993 o ganlyniad i'r newidiadau yn Rhan 2 o Atodlen 2. Maent, felly, yn ganlyniadol ar ddarpariaeth ddatganoledig, ac mae angen cydsyniad ar eu cyfer.

Rhan 5 – Dŵr

53. Mae cymalau 75, 76, 77, 79, 81, 82 a 85 yn ymwneud ag ansawdd dŵr.

Cymalau 75 – 76 (cynlluniau a chynigion)

54. Mae cymal 75 yn diwygio Deddf y Diwydiant Dŵr 1991 mewn perthynas â dyletswyddau cyffredinol ymgwymerwyr dŵr i baratoi cynigion a chynlluniau ar y cyd. Mae hyn yn cynnwys pŵer i Weinidogion Cymru wneud rheoliadau i ddarparu ar gyfer y weithdrefn ar gyfer paratoi a chyhoeddi cynlluniau rheoli adnoddau dŵr, cynlluniau sychder, a chynigion ar y cyd. Mae'r rheoliadau hyn yn dilyn y weithdrefn penderfyniad negyddol.
55. Mae cymal 76 yn diwygio Deddf y Diwydiant Dŵr 1991 mewn perthynas â chynlluniau rheoli draeniad a charthffosiaeth. Mae hyn yn cynnwys rhoi pŵer i Weinidogion Cymru wneud rheoliadau i ddiwygio'r cyfnod a ganiateir i ymgwymerwr baratoi a chyhoeddi cynllun diwygiedig. Mae'r rheoliadau hyn yn dilyn y weithdrefn penderfyniad negyddol.
56. Mae cymalau 75 a 76 yn ymwneud â dŵr a charthffosiaeth ond nid ydynt yn ymwneud ag unrhyw un neu rai o'r materion a gadwyd yn ôl yn Atodlen 7A i Ddeddf Llywodraeth Cymru. Mae'r cymalau hyn yn rhoi pwerau i Weinidogion Cymru mewn perthynas ag ymgwymerwyr dŵr a charthffosiaeth y mae eu hardaloedd yn gyfan gwbl neu'n bennaf yng Nghymru ac nad ydynt felly yn dod o dan y materion a gadwyd yn ôl ym mharagraffau 92 a 93 o Atodlen 7A i Ddeddf Llywodraeth Cymru. Gan fod y darpariaethau hyn, felly, o fewn cymhwysedd deddfwriaethol i'r graddau y maent yn gymwys mewn perthynas â Chymru, ac y byddai modd eu gwneud drwy gyfrwng Bil gan y Cynulliad, mae angen cydsyniad ar eu cyfer.

Cymal 77 (Pŵer awdurdod i wneud gwybodaeth yn ofynnol)

57. Mae cymal 77 yn diwygio Deddf y Diwydiant Dŵr 1991er mwyn rhoi pŵer i Ofwat ei gwneud yn ofynnol i ymgwymerwyr dŵr neu garthffosiaeth neu i drwyddedeion cyflenwadau dŵr neu garthffosiaeth ddarparu gwybodaeth ar ddibenion monitro.
58. Mae cymal 77 yn ymwneud â dŵr a charthffosiaeth, ac i'r graddau y gallai'r Cynulliad ddarparu ar gyfer yr un ddarpariaeth mewn perthynas â Chymru, mae angen cydsyniad y Cynulliad.

Cymal 79 (Cyflwyno dogfennau'n electronig)

59. Mae cymal 79 yn diwygio Deddf y Diwydiant Dŵr 1991 ac yn gwneud darpariaeth ynglŷn â chyflwyno dogfennau'n electronig i Ofwat.
60. Gan nad yw cymal 79 yn un o'r materion a gadwyd yn ôl, ac y byddai modd ei wneud drwy gyfrwng Bil gan y Cynulliad, mae Llywodraeth Cymru o'r farn bod angen cydsyniad ar ei gyfer.

Cymal 81 (Ansawdd dŵr: pwerau'r Ysgrifennydd Gwladol)

61. Mae cymal 81 yn rhoi pŵer i'r Ysgrifennydd Gwladol wneud rheoliadau ar gyfer darparu ynghylch y sylweddau i'w hystyried wrth asesu statws cemegol dŵr wyneb neu ddŵr daear, ac i bennu safonau ar gyfer y sylweddau hynny neu mewn perthynas â statws cemegol dŵr wyneb neu ddŵr daear. Mae rheoliadau o dan y ddarpariaeth yn dilyn y weithdrefn penderfyniad negyddol ac mae gofynion hefyd o ran ymgynghori am y rheoliadau hynny.

62. Caniateir i reoliadau o dan y cymal hwn gael eu gwneud gan yr Ysgrifennydd Gwladol mewn perthynas â Chymru, naill ai—

- pan nad oes gan Weinidogion Cymru y cymhwysedd gweithredol i wneud rheoliadau o dan gymal 82 (h.y. mae arfer y pŵer y tu hwnt i'w cymhwysedd deddfwriaethol – gweler cymal 82(5)); neu
- gyda chydysyniad Gweinidogion Cymru os oes ynddynt ddarpariaeth y gellid ei chynnwys mewn rheoliadau a wneir gan Weinidogion Cymru o dan adran 82.

63. Gan fod y pŵer uchod yn un 'cydredol plws', mae angen cydsyniad i'r graddau y mae'r ddarpariaeth yn 'ddarpariaeth berthnasol' o dan RhS29.1(ii).

Cymal 82 (Ansawdd dŵr: pwerau Gweinidogion Cymru)

64. Mae cymal 82 yn rhoi pŵer gwneud rheoliadau y gellir, yn fras, ei gymharu â'r pŵer yng nghymal 81, i Weinidogion Cymru ac yn darparu bod yn rhaid i Weinidogion Cymru ymgynghori â chyrrff penodol cyn gwneud rheoliadau o dan y ddarpariaeth hon. Bydd rheoliadau a wneir o dan gymal 82 yn dilyn y weithdrefn penderfyniad negyddol. Dim ond gwneud darpariaeth ar gyfer materion sydd o fewn cymhwysedd deddfwriaethol y Cynulliad y caiff rheoliadau o dan y ddarpariaeth hon.

65. I'r graddau y mae cymal 82 yn gwneud darpariaeth ar gyfer ansawdd dŵr, sef diben sydd o fewn cymhwysedd deddfwriaethol y Cynulliad, mae angen ei gydsyniad.

Cymal 85 (Ansawdd dŵr: dehongli)

66. I'r graddau y mae'r ddarpariaeth hon yn gymwys i'r darpariaethau uchod, mae angen cydsyniad ar ei chyfer.

Cymalau 86 - 89 (Draenio tir)

67. Mae cymal 87 yn diwygio adran 83 o Ddeddf yr Amgylchedd (Cymru) 2016 ac mae'n rhoi pŵer i Weinidogion Cymru wneud rheoliadau er mwyn darparu ar gyfer penderfynu ar werth tir arall mewn ardal ddraenio fewnol yng Nghymru yn unol â'r rheoliadau. Mae rheoliadau a wneir o dan yr adran hon yn dilyn y weithdrefn gadarnhaol. Dim ond mewn perthynas ag ardaloedd draenio mewnol yng Nghymru y mae'r cymal hwn yn gymwys

ac mae, felly, o fewn cymhwysedd deddfwriaethol y Cynulliad ac mae angen ei gydsyniad.

68. Mae cymal 88 yn diwygio Deddf Draenio Tir 1991 ac yn rhoi pŵer i Weinidogion Cymru wneud rheoliadau sy'n darparu mai'r bwrdd draenio mewnol ar gyfer yr ardal o dan sylw sy'n penderfynu, yn unol â'r rheoliadau, ar werth blynyddol pob eiddo y gellir codi tâl arno mewn ardal ddraenio fewnol yng Nghymru. Mae rheoliadau a wneir o dan y ddarpariaeth hon yn dilyn y weithdrefn gadarnhaol.
69. Mae cymal 89 yn diwygio Deddf Draenio Tir 1991 ac yn gwneud darpariaeth ynglŷn â CThEM yn datgelu gwybodaeth am referniw a thollau i berson cymwys, gan gynnwys CNC a Gweinidogion Cymru, at ddiben a bennir yn adran 37A. Mae'r adran 37A newydd hefyd yn rhoi pŵer i Weinidogion Cymru wneud rheoliadau, pan fo ardaloedd draenio mewnol yng Nghymru o dan sylw, i bennu bod person yn berson cymwys at ddibenion yr adran hon. Mae rheoliadau a wneir o dan yr adran hon yn dilyn y weithdrefn gadarnhaol a dim ond gyda chydsyniad Comisiynwyr CThEM y caniateir iddynt gael eu gwneud.
70. Gan fod cymalau 87, 88 a 89 yn gwneud darpariaeth mewn perthynas â draenio tir, sef diben sydd o fewn cymhwysedd deddfwriaethol y Cynulliad, mae Llywodraeth Cymru o'r farn bod angen ei gydsyniad.

Rhan 8 – Darpariaethau Amrywiol a Chyffredinol

Cymal 125 (Diwygio deddfwriaeth Cofrestru, Gwerthuso, Awdurdodi a Chyfyngu ar Gemegau (REACH))

71. Mae cymal 125 yn cyflwyno Atodlen 19 sy'n rhoi'r pŵer i'r Ysgrifennydd Gwladol ddiwygio Erthyglau Rheoliad REACH. Mae'r pŵer hwn yn ymarferadwy yn ddarostyngedig i'r gofyniad sy'n ymwneud â chydsyniad yn Erthygl 4A o Reoliad REACH.
72. Mae Atodlen 19 hefyd yn rhoi pŵer i'r Ysgrifennydd Gwladol ddiwygio Rheoliadau Gorfodi REACH. Rhoddir pŵer i Weinidogion Cymru o dan y ddarpariaeth hon hefyd mewn perthynas â diwygio Rheoliadau Gorfodi REACH, i'r graddau y byddai arfer y pŵer o fewn cymhwysedd deddfwriaethol. Byddai rheoliadau o'r fath yn dilyn y weithdrefn gadarnhaol. Mae'r pŵer hwn yn ymarferadwy yn gydredol â'r Ysgrifennydd Gwladol.
73. Mae'r darpariaethau hyn yn cynnwys darpariaeth sydd o fewn cymhwysedd deddfwriaethol y Cynulliad, megis diogelu'r amgylchedd ac iechyd pobl. Mae angen cydsyniad ar gyfer y ddarpariaeth felly.

74. Yn ogystal â'r uchod, bernir hefyd fod angen cydsyniad ar gyfer greu swyddogaethau cydredol plws mewn perthynas â'r pŵer i ddiwygio Rheoliadau Gorfodi REACH.

Gweddill Rhan 8

75. Bydd angen cydsyniad ar gyfer y darpariaethau cyffredinol yn y Bil i'r graddau y maent yn ymwneud â'r darpariaethau yn y Bil sydd, ynddynt eu hunain, yn 'ddarpariaeth berthnasol' at ddibenion RhS29.

Pwerau cydredol plws

76. Mae pwerau cydredol plws yn y Bil mewn perthynas â chymalau 47-51 a'r atodlenni cysylltiedig, cymal 81 a chymal 125. Fel y'i drafftwyd ar hyn o bryd, mae cynnwys y swyddogaethau 'cydredol plws' yn y Bil yn golygu hefyd fod angen cydsyniad ar gyfer y cymalau hefyd oherwydd y gellid dadlau eu bod yn 'addasu cymhwysedd deddfwriaethol y Cynulliad' (ac y byddent, yn eu tro, yn 'ddarpariaethau perthnasol at ddibenion RhS29.1(ii)).

77. Nid oedd digon o amser cyn cyflwyno'r Bil i eithrio'r darpariaethau cydredol plws o'r cyfyngiadau cysylltiedig yn Atodlen 7B. Mae Is-ysgrifennydd Gwladol yr Amgylchedd yn Senedd y DU wedi gwneud ymrwymiad Gweinidogol i ddatgymhwyso'r darpariaethau hyn. Ar hyn o bryd, oherwydd y bydd y darpariaethau'n addasu cymhwysedd y Cynulliad ac oherwydd eu bod hefyd yn ddarpariaethau at ddiben sydd o fewn cymhwysedd y Cynulliad, bydd angen cydsyniad ar eu cyfer.

Y rhesymau dros wneud y darpariaethau hyn ar gyfer Cymru ym Mil yr Amgylchedd

78. Rydym yn dilyn yr egwyddor mai'r Cynulliad Cenedlaethol ddylai ddeddfu deddfwriaeth sylfaenol. Wedi dweud hynny, mae'n synhwyrol ac yn fanteisiol o dan rai amgylchiadau ac ar ôl cael cydsyniad y Cynulliad, i ofyn am ddarpariaethau ym Miliâu Senedd y DU a fyddai o fewn cymhwysedd deddfwriaethol y Cynulliad.

79. Ar hyn o bryd, nid oes amser yn amserlen y Cynulliad i gyflwyno Bil yr Amgylchedd y gellid ei ddefnyddio i gyflwyno'r darpariaethau hyn.

80. Mewn perthynas â darpariaethau sy'n cael eu gwneud ar gyfer cyfrifoldeb estynedig cynhyrchwyr a rheoli gwastraff, a phlastigau untro, mae'r Bil yn gyfle amserol i fwrw ymlaen â nodweddion allweddol y strategaeth ar gyfer economi gylchol. Yn achos cyfrifoldeb estynedig cynhyrchwyr a rheoli gwastraff, mae datblygu dull rheoleiddiol sy'n caniatáu cysondeb rhwng Cymru, Lloegr a Gogledd Iwerddon yn bwysig am resymau sy'n gysylltiedig â'r farchnad ac mae'n adlewyrchu'r ffaith bod llawer o fusnesau sy'n gweithredu yn y sector yn gweithredu ar draws ffiniau.

81. Yn achos pwerau sy'n ymwneud â chyfrifoldeb estynedig cynhyrchwyr, rheoli gwastraff, cynlluniau a chynigion sy'n gysylltiedig â dŵr, rheoleiddio ymgwymerwyr dŵr a charthffosiaeth, a rheoliadau REACH, mae'r ffaith bod y systemau gweinyddol perthnasol yng Nghymru a Lloegr yn rhai cydgysylltiedig yn golygu mai'r ffordd fwyaf effeithiol a phriodol o weithredu yw bod darpariaethau yn cael eu cyflwyno ar yr un pryd yn yr un offeryn statudol.

82. Mae Llywodraeth Cymru, at ei gilydd, yn cefnogi'r Bil fel y'i drafftwyd. Wedi dweud hynny, mae tri mater sy'n peri pryder ac sydd heb eu datrys. Mae'r Materion hynny'n ymwneud ag effaith cymal 19 (na fydd safonau o ran diogelu'r amgylchedd yn is nag ar hyn o bryd) ar gymhwysedd datganoledig ac ar y ddyletswydd sydd ar Swyddfa Diogelu'r Amgylchedd i ymgynghori â chyrff llywodraethu amgylcheddol datganoledig (cymal 24(4)). O dan gymal 24(4), mae'n ofynnol i Swyddfa Diogelu'r Amgylchedd ymgynghori â chorff llywodraethu amgylcheddol datganoledig os yw o'r farn y gallai arfer swyddogaethau penodol sydd ganddi fod yn berthnasol i arfer swyddogaeth llywodraethu amgylcheddol sydd wedi'i datganoli. O gofio bod posibilrwydd y gallai Swyddfa Diogelu'r Amgylchedd ymchwilio i gŵyn a allai fod yn gysylltiedig â materion a gadwyd yn ôl a materion sydd wedi'u datganoli, mae'n bosibl y bydd angen y gallu ar y corff hwnnw i gydweithio â chorff cyfatebol yng Nghymru. Mae'r materion hyn yn cael eu trafod gydag Adran yr Amgylchedd, Bwyd a Materion Gwledig (DEFRA) ar hyn o bryd.

83. Mae angen datgymwysiad hefyd mewn perthynas â pharagraff 11, Atodlen 7B o Ddeddf Llywodraeth Cymru 2006 mewn cysylltiad â phwerau cydredol sy'n ymwneud â chyfrifoldeb estynedig cynhyrchwyr, ansawdd dŵr, a REACH. Mae Is-ysgrifennydd Gwladol yr Amgylchedd yn Senedd y DU wedi gwneud ymrwymiad i ddatgymhwyso'r darpariaethau hyn.

Goblygiadau ariannol

84. Nid oes unrhyw oblygiadau ariannol ychwanegol i Lywodraeth Cymru nac i'r Cynulliad ar hyn o bryd o ganlyniad i gymryd y pwerau hyn yn y bil hwn.

Casgliad

85. Ym marn Llywodraeth Cymru, mae'n briodol defnyddio Bil yr Amgylchedd y DU i gyflwyno mentrau y mae'n debygol y bydd eu hangen er mwyn bwrw ymlaen â'r strategaeth ar gyfer economi gylchol, yn enwedig pan fydd angen gweithredu mewn ffordd gydgysylltiedig gyda gweinyddiaethau eraill y DU. Yn yr un modd, mae rheoli ansawdd dŵr mewn ffordd effeithiol a rheoleiddio cemegau ar ôl i'r DU ymadael â'r UE yn faterion priodol ar gyfer y Bil hwn. Mae'r newidiadau deddfwriaethol arfaethedig sy'n ymwneud ag ansawdd aer a draenio tir yn fodd i wneud cyfrifoldebau

Gweinidogion Cymru yn fwy clir, neu mae'r newidiadau a wneir yn rhai gweinyddol eu natur, ac mae'r Bil yn cynnig cyfle amserol i fwrw ymlaen â hwy.

Lesley Griffiths AC
Gweinidog yr Amgylchedd, Ynni a Materion Gwledig
Chwefror 2020

Atodiad A

Darpariaeth	Disgrifiad o'r Pŵer	Gweithdrefn Deddfwriaethol
Cymal 47 Atodlen 4 Rhwymedigaethau o ran cyfrifoddeb cynhyrchwyr	Mae'n rhoi pŵer i wneud rheoliadau i osod rhwymedigaethau o ran cyfrifoddeb cynhyrchwyr ar bersonau penodedig ac mewn perthynas â chynhyrchion neu ddeunyddiau penodedig	Y weithdrefn gadarnhaol
Cymal 48 Atodlen 6 Cyfrifoddeb cynhyrchwyr dros gostau gwaredu	Mae'n rhoi pŵer i wneud rheoliadau sy'n ei gwneud yn ofynnol i'r rheini sy'n gysylltiedig â gweithgynhyrchu, prosesu, dosbarthu neu gyflenwi cynhyrchion neu ddeunyddiau dalu costau gwaredu'r cynhyrchion hynny, neu neu gyfrannu atynt.	Y weithdrefn gadarnhaol
Cymal 49 Atodlen 7 Gwybodaeth am effeithlonrwydd o ran adnoddau	Mae'n rhoi pŵer i wneud rheoliadau sy'n pennu gofynion i weithgynhyrchwyr a chynhyrchwyr ddarparu gwybodaeth am effeithlonrwydd eu cynhyrchion o ran adnoddau.	Y weithdrefn gadarnhaol
Cymal 50 Gofynion sy'n gysylltiedig ag effeithlonrwydd o ran adnoddau	Mae'n rhoi pŵer i'r awdurdod cenedlaethol perthnasol wneud rheoliadau sy'n pennu gofynion effeithlonrwydd o ran adnoddau y mae'n ofynnol i gynhyrchwyr eu bodloni.	Y weithdrefn gadarnhaol
Cymal 51 Atodlen 8 Cynlluniau blaendal	Mae'n rhoi pŵer i'r awdurdod cenedlaethol perthnasol wneud rheoliadau i sefydlu cynlluniau blaendal.	Y weithdrefn negyddol
Cymal 52 Atodlen 9 Taliadau am eitemau plastig untro	Pŵer gwneud rheoliadau i wneud darpariaeth ynglŷn â	Y weithdrefn negyddol

Darpariaeth	Disgrifiad o'r Pŵer	Gweithdrefn Deddfwriaethol
	chodi tâl gan werthwyr nwyddau am gyflenwi eitemau untro.	
Cymal 55 Olrhain gwastraff yn electronig: Prydain Fawr	Mae'n rhoi pwerau i Weinidogion Cymru gyflwyno trefniadau olrhain gwastraff yn electronig (digidol) ac i sefydlu system electronig at y diben hwnnw drwy gyfrwng rheoliadau.	Mae cymal 55(3) yn gwneud diwygiadau i adran 160A(2) o Ddeddf Diogelu'r Amgylchedd 1990, fel y'i mewnosodir gan gymal 60, er mwyn darparu ar gyfer y weithdrefn ar gyfer y pwerau newydd i wneud rheoliadau. Mae rheoliadau o dan adrannau 34CA a 34CB newid yn dilyn y weithdrefn negyddol, ac eithrio yn y sefyllfaoedd a bennir yn yr adran 160A(2) newydd, pan fydd y weithdrefn gadarnhaol yn cael ei defnyddio.
Cymal 57 Gwastraff peryglus: Cymru a Lloegr	Mae'n rhoi pŵer i wneud rheoliadau er mwyn gwneud darpariaeth ynghylch rheoleiddio gwastraff peryglus, neu mewn cysylltiad â hynny.	Mae rheoliadau o dan yr adran 62ZA newydd yn dilyn y weithdrefn negyddol, ac eithrio yn y sefyllfaoedd a bennir yn yr adran 160A(2) newydd (fel y'i cyflwynir gan gymal 60 ac y'i diwygir gan gymal 57), pan fydd y weithdrefn gadarnhaol yn cael ei defnyddio.
Cymal 65 Gorfodi yng nghyswllt gollwng sbwriel	Mae'n diwygio Rhan 4 o Ddeddf Diogelu'r Amgylchedd 1990 mewn perthynas â gorfodi yng nghyswllt gollwng sbwriel, a	Y weithdrefn negyddol. Ni fyddai unrhyw weithdrefn ar gyfer canllawiau a ddyroddid o

Darpariaeth	Disgrifiad o'r Pŵer	Gweithdrefn Deddfwriaethol
	<p>throseddau eraill o ollwng sbwriel o gerbyd a dosbarthu deunydd argraffedig yn rhad ac am ddim heb yr awdurdod i wneud hynny.</p> <p>Mae'n rhoi pŵer newydd i Weinidogion Cymru (gan mai hwy yw'r 'person priodol' yng Nghymru) ragnodi, drwy gyfrwng rheoliadau, amodau y mae'n rhaid iddynt gael eu bodloni gan swyddog awdurdodedig sy'n gweithredu ar ran awdurdod sydd â chyfrifoldebau o ran gollwng sbwriel, ac i wneud darpariaeth sy'n ei gwneud yn ofynnol i awdurdod sydd â chyfrifoldebau o ran gollwng sbwriel ddirymu awdurdodiad swyddog os bydd y swyddog hwnnw'n methu â bodloni'r amodau rhagnodedig.</p> <p>Mae hefyd yn rhoi pwerau i Weinidogion Cymru wneud canllawiau.</p>	dan y pwerau hyn.
Cymal 66 Hysbysiadau Cosb Benodedig	Pwerau i amrywio lefelau Hysbysiadau Cosb benodedig a sut y gellir talu.	Y weithdrefn negyddol
Cymal 67 Rheoleiddio	Rheoleiddio gwiethgareddau sy'n	Y weithdrefn negyddol

Darpariaeth	Disgrifiad o'r Pŵer	Gweithdrefn Deddfwriaethol
gwiethgareddau sy'n achosi llygredd	achosi llygredd.	
Cymal 75 Cynlluniau rheoli adnoddau dŵr, cynlluniau sychder a chynigion ar y cyd	Mae'n rhoi pwerau i Weinidogion Cymru mewn perthynas ag ymgymerydd dŵr a charthffosiaeth y mae eu hardaloedd yn gyfan gwbl neu'n bennaf yng Nghymru.	Y weithdrefn negyddol
Cymal 76 Cynlluniau rheoli draenio a charthffosiaeth	Mae'n rhoi pwerau i Weinidogion Cymru mewn perthynas ag ymgymerydd dŵr a charthffosiaeth y mae eu hardaloedd yn gyfan gwbl neu'n bennaf yng Nghymru.	Y weithdrefn negyddol
Cymal 82 Ansawdd dŵr: pwerau Gweinidogion Cymru	Pŵer i ddiwygio deddfwriaeth i wneud diweddariadau technegol ym maes ansawdd dŵr, ar ôl i'r DU adael yr UE.	Y weithdrefn negyddol
Cymal 87 Prisio tir arall mewn ardal ddraenio: Cymru	Diwygiad i Ddeddf yr Amgylchedd (Cymru) 2016 sy'n diwygio Deddf Draenio Tir 1991. Mae'n ailddatgan pwerau sy'n bodoli eisoes i wneud rheoliadau yng ngoleuni diwygiadau i Ddeddf 1991, gan gynnwys y pŵer cysylltiedig a gyflwynir yng nghymal 88 i wneud rheoliadau.	Y weithdrefn gadarnhaol
Cymal 88 Prisio tir amaethyddol mewn ardal ddraenio: Cymru a Lloegr	Mae'n rhoi pŵer i wneud rheoliadau sy'n darparu methodoleg arall ar gyfer cyfrifo cyfraddau draenio.	Y weithdrefn gadarnhaol
Cymal 89 Datgelu gwybodaeth am Refeniw a Thollau	Mae'r darpariaethau'n caniatáu i CThEM rannu gwybodaeth â phersonau cymwys at ddibenion cymwys. Rhoddir pŵer i wneud rheoliadau fel y bo	Y weithdrefn gadarnhaol

Darpariaeth	Disgrifiad o'r Pŵer	Gweithdrefn Deddfwriaethol
	modd ychwnaegu at y rhestr o 'bersonau cymwys'.	
Cymal 125 Diwygio Deddfwriaeth REACH	Mae'n rhoi pŵer i Weinidogion Cymru mewn perthynas â diwygio Rheoliadau Gorfodi REACH o dan y ddarpariaeth hon i'r graddau y byddai arfer y pŵer hwnnw o fewn cymhwysedd deddfwriaethol.	Y weithdrefn gadarnhaol